



KEMENTERIAN WILAYAH PERSEKUTUAN
Aras G-7, Blok 2, Menara Seri Wilayah, Presint 2, 62100 Putrajaya
Tel: 03-8889 7888 Faks: 03-8889 7957
Laman web: www.kwp.gov.my

KENYATAAN MEDIA

UNTUK LIPUTAN MEDIA MASSA

1,000 BAKUL MAKANAN DIAGIH KEPADA GOLONGAN SASAR DI PUTRAJAYA

Kementerian Wilayah Persekutuan (KWP) dengan kerjasama Perbadanan Putrajaya (PPj) menganjurkan **Program Penyampaian Bakul Makanan Kenduri Rakyat Putrajaya** yang merupakan salah satu program yang diatur bersempena **Sambutan Hari Wilayah Persekutuan 2021**.

Program inisiatif KWP dan agensi-agensi di bawahnya yang berkonsepkan pengagihan bakul makanan terus ke pintu rumah golongan sasaran dengan pematuhan SOP yang ditetapkan Kerajaan dalam suasana norma baharu ini adalah julung kalinya diadakan bertepatan dengan tema Wilayah Persekutuan Wilayah Prihatin (WP Wilayah Prihatin) serta mengambil kira Perintah Kawalan Pergerakan (PKP) yang tidak membolehkan untuk penganjuran majlis kenduri rakyat secara berhimpun sebagaimana kelaziman bagi sambutan Hari Wilayah Persekutuan tahun-tahun sebelumnya.

Program di Putrajaya pada petang ini merupakan hari kedua bagi program seumpamanya selepas hari pertama diadakan di kawasan Wangsa Maju dan Setiawangsa pada 1 Februari 2021 dan akan dilaksanakan di kesemua tiga belas kawasan Parlimen di bawah Wilayah Persekutuan Kuala Lumpur, Putrajaya dan Labuan.

Bagi peringkat Putrajaya, sebanyak 1,000 bakul makanan berbentuk baucer tunai bernilai RM100.00 setiap satu dengan jumlah keseluruhan peruntukan RM100,000 telah diluluskan dan akan diagihkan kepada keluarga berpendapatan rendah di Wilayah Persekutuan Putrajaya bermula 16 Februari 2021 di mana baucer tunai tersebut boleh ditunaikan di pasaraya AEON Big atau Coop Mart di Presint 16.

Pengagihan bakul makanan ini akan diselaraskan bersama di antara KWP, PPj dan Majlis Perwakilan Penduduk Wilayah Persekutuan Putrajaya. Komuniti yang memerlukan bantuan bakul makanan ini juga boleh mengisi borang permohonan yang didapati di kaunter Blok A, Kompleks Perbadanan Putrajaya atau dimuat turun di portal ppj.gov.my bermula pada 8 Februari ini.

Saya bersyukur dapat turun padang pada hari ini untuk menyampaikan sendiri sebanyak lima (5) bakul makanan kepada sebahagian keluarga berpendapatan rendah di Pangsapuri Putra Damai Blok F, Presint 11 Putrajaya sambil merakamkan penghargaan dan ucapan Hari Wilayah Persekutuan serta dapat mendengar secara terus luahan hati mereka.

Semoga dengan sumbangan kecil ini dapat memberi makna yang besar dalam meringankan beban khususnya kepada golongan berpendapatan rendah yang sangat terkesan akibat pandemik COVID-19, seterusnya menyokong ke arah merealisasikan aspirasi KWP dan agensi dalam memupuk serta membudayakan sifat keperihatinan dan kecaknaan warga Wilayah Persekutuan dalam setiap aspek kehidupan.

TAN SRI TP_r HJ ANNUAR MUSA

Menteri Wilayah Persekutuan

2 Februari 2020